

2 कुरेंति

कुरेंति विस्वासुल्कुंक पौलुसना रोंडो सिट्टि

इद सिट्टिता बारेमते गिचचो परिचयम
 रासतोना पोरोल: पौलुस
 रासता कालम: इसवि सन 57

कुरेंति कलिसियातोरक पौलुस रासतद इद रोंडो सिट्टि आंदु. आबद्दम करहानोरा इच्चुर गुस्कुनाहेंदाल पौलुस आनि कुरेंति कलिसियातोरा नड्डुम समस्या तयार आता. इच्चुर विस्वासुल्कगुडा पौलुसुना पोल्लें केंजाकोंटा आतुर इंचि पौलुसुंक तेळियता.

अदुनहाटी पौलुस इद सिट्टि मेसिडोनिया सहरताल रासतोर. कलिसियाते बच्चोर तकलिप वायिना विस्वासुल्क किरिस्तुनलोप्पो गट्टिगा निल्सि मननाहाटी दैरनेम हियालय रासतोर. निजम पेनदा सेवा कियानोर बल्हा मनागोम इंचि तेडियागोटसि वेहालय रासतोर. अल्हेने इच्चुर विस्वासुल्क आबद्दम करहानोरा पोल्लें केंजसि पौलुसुन विरोद कियुंदुर, अदुनहाटी पौलुस ओना सतता अदिकारमतुन पीसि ओर्क इस सिट्टि रासतोर.

बगा बतल मंता

जोहार आनि परिचयम **1:1-11**

कुरेंतिते पौलुस आनि कलिसिया **1:12-7:16**

यहुदियाता विस्वासुल्कुनाहाटी चंदा जमा कियमळ **8:1-9:15**

पौलुस प्रेरित आंदुर इंचि रूजुव कीसि हुप्संतोर **10:1-13:10**

आकिरता बोदां **13:11-13**

1 पेनदा इच्छाताहेंदाल किरिस्तु येसुना प्रेरित आतोन नना पौलसुन आनि मना तम्मुर तिमोति ओक्कला कुरेंति सहरते मंदना कलिसियातोंर्क अल्हेने अकाया एरियाता अंटोर पवित्र लोकलुकुंक सिट्टि रासेक मंतोम.*

2 मना पेनबाबाल आनि सामि येसु किरिस्तुनाहेंदाल मीक कुर्पा, सांति दोर्कसेके मनि.

पौलस पेनदुन दन्यवाद कीतो

3 मना सामि येसु किरिस्तुना पेनबाबाल दयागल्लोड अल्हेने अन्नि तीरकुना सांति हियाना पेन आंदुर, अदुनहाटी ओन्क दन्यवाद आयि.

4 मनम इंकावरोक सांति हियागोम इंचि पेन मनाकु अन्नि तकलिपकुने सांति हीसेक मंता. बोर अय्ते तकलिपते मंतुर, पेन मनाकु हीता सांतितुने मनम ओर्क हिया परगोम इंचि दाना इच्छा मंता.

5 बारित्ते मनम किरिस्तुनाहाटी बच्चोर एक्को तकलिप अरंतोम, अच्छोर एक्को किरिस्तुनहेंदाल मनाकु सांतिगुडा बेस्सेके दांता.

6 मीक सांति आनि मुक्ति दोर्कागोम इंचे मोमोट तकलिप बोगांचेके मंतोम. माक सांति दोर्कता इत्ते, अद मीवा सांतिताहाटीगे आंद. इदुनहेंदाल बद तकलिपतुन अय्ते मोमोट ओर्सकुत्तोम, मिमेटगुडा अदे तकलिपतुन ओप्केते ओर्सकुना परांतिर.

7 मावा तकलिपते मिमेट बल्हा कलियसि मंतिरो अल्हेने मावा सांतितेगुडा मिमेट कलियसि मंतिर. अदुनहाटी मीवा बारेमते मावा आसे गट्टिगा मंता.

8 विस्वासुल्लकुनिटा! आसिया एरियाते† माक वेल्लेने तकलिप वाता, अद तकलिप मोमोट आपकुना परवच्चो मत्ता, मोमोट पिसंतोम इंचिगुडा इनकुना हिल्लोम. अद पोल्ले मीक तेळियसि मनागोम इंचि वेहासेक मंतोम.

9 निजमे, माक हामुरता सिक्सा दोर्कता इंचि इनकुंचेके मत्तोम, गानि कुद मनापोर्रो मनम बरोसा इरामन्नि, हातोरुन तेहाना पेन पोर्रो बरोसा इरमळ गावाले इंचि इल्हा जर्गता.

10 पेने माकुन अच्छोर पेद्दा हामुरता गंडेमताल पिसागोटता, पिसागोटसेक मंता, मुन्नेगुडा माकुन पिसागोटसेक मनंता इंचि माक अदुन पोर्रो आसे मंता.

* 1:1 इद सिट्टितुन पौलस वर्रे रासतोर, सिलवानुस आनि तिमोति ओनतोन जोहर इंचि वेहतुर.

† 1:8 आसिया एरिया अस्केटा आसिया एरिया इत्ते, इंदकेटा तुर्कि देसेम आंद.

11 वेल्लेटोरा पारतनाहेंदाल पेन मापोर्रो दया हुपिचि माकुन पिसागोटता, अदुनहाटी वेल्लेटुर लोकुल्क माहेंदाल पेनदुक दन्यवाद कीसेक मंतुर. अय्ते मिमेटगुडा अंतोर कूळसि माहाटी पारतना कीसि माक सहायम कीम्टु.

पौलुसना पय्नेमता पिलान बदलांचमळ

12 मोमोट दुनियाते मननेके कास कीसि मीवा नड्डुम मननेके, पेनदुक इस्टामाताप पवित्र आनि सत्तेमते मत्तोम, अद मनकना तेल्विते आयो गानि पेनदा कुर्पातोनि मत्तोम इंचि मावा मनसु गवाइ वेहासेक मंता. इद मावाहाटी पेद्दिदरेकेमता पोल्ले आंद.

13-14 मिमेट हदविते मीक, तेळियाना पोल्लेंगे मोमोट रासेक मंतोम, अव आयाका वेरे बवे पोल्लें मीक रासेक हिल्लोम. आनि आकिरदाका मिमेट अवुन कबुल कीतिर इंचि नाक आसे मंता. अचोने आयाका सामि येसु वायाना रोजुने मोमोट मीपोर्रो पेद्दिदरेकेम कीताप, मिमेटगुडा मापोर्रो पेद्दिदरेकेम कीकिट.

15-16 इद बरोसाता हेंदाले नना मोदाला मिहगा आगिसि, मिहागटाल मेसिडोनिया दांतन. मर्रा मेसिडोनियाताल मल्सि वायानेंकेगुडा मीकु रोंडु पाय्दां आयगोम इंचि मिहगा आगंतन. पजा अगटाल मिमेट नाकुन यहुदिया एरियाताहाटी साल्ना किया परांतिर इंचि इनकुंचेके मंतन.

17 नना इव पिलानकु बतले विचारम कियाकेने कीतोर इंचेके मंतिरा? दुनियाता लोकुल्कुनालेसीं उंदि मल्का “हो” इंचि इंकुंदि मल्का “हिल्ले” इंचि इनानोन आयोन.

18 पेन विस्वासमगल्लद आंद. अल्हेन मोमोटगुडा “हो” आनि “हिल्ले” इल्हा रोंडु पोल्लें वळकोम.

19 बारित्ते, नना, सिल्वानुस आनि तिमोति मोमोट मीवा नड्डुम पेनदा मर्रि येसु किरिस्तु आंदुर इंचि वेहतोम. येसु किरिस्तु “हो, हिल्ले” इल्हा रोंडु पोल्लें वळकोर गानि ओर बस्केळक “हो” इंचे इंतोर.

20 पेनदा अन्नि पोल्लें येसुनगा पूरा आतां. अदुनहाटीं मनम आमीन इंचि पेनदा महिमा कीतोम.

21 मीवातोनि अबिसेकम कीसि, किरिस्तुनलोप्पो गट्टिगा निलाहनोर पेने आंदु.

22 पेन मनापोर्रो सिक्का वाटता अल्हेने गेरंटितालेसीं मनालोप्पो दाना पवित्र आत्मातुन इरता.

23 मीकुन इंका नोप्पिचमळ नाक इस्टम हिल्ले, अदुनहाटीं नना इदवेरादाका मिहगा कुरेंति सहर वाया हिल्लेन. इद पोल्ले निजम इंचि ना मनसुन ह्ळना पेने गवाइ मंता.

24 मीवा विस्वासम पोरों अदिकारम हुप्सना इंचि मोमोट वेहासेक हिल्लोम, मिमेट विस्वासमते गट्टिगा निल्लि मंतिट, मीवा आनंदमते मोमोटगुडा मीवा तोळ मनंतोम.

2

1 नना मिहगा वासि मीक मर्रा दुक्कम वायागोटोन इंचि मनसुने इनकुत्तन.

2 बारिते नना मीकुन दुक्कम कीते, नाकुन बोर आनंदम कियानुर? मीक तप्पा बोरे किय्युर!

3 नना अगा वातस्के नाक बोराहेंदाल अय्ते कुसि आयाना मंता, ओरा अंटोराहेंदाल नाक दुक्कम आयामन्नि इंचि नना मुन्ने अद सिट्टि* रासि लोहतन. नाक मी बारेमते विस्वासम मंता, नावा कुसि मीवा अंटोरदगुडा कुसि आंद.

4 नना नावा मनसुनाल वेल्ले दुक्कमते, बादाते अळसेके अद सिट्टि रासि मीक लोहतन. नना मीक दुक्कम कियालय आयो गानि मीवापोरों नावा पावरम बच्चो वेल्ले मंता, अद मीक तेळियगोम इंचि नना रासि मत्तन.

तप्पु कीतोन मापि कियाना

5 बोरन्नागिंटा दुक्कम हियानय्ते, ओर सिराप नाकुने दुक्कम हीतोर इत्ताप आयो, तक्को-एक्को मीक अंटोर्कगुडा हीतोर. इदुना बारेमते नना दीनकन्ना एक्को बतल वेहोन.

6 असंटोनाहाटीं मिमेट वेल्लेटुर हीता सिक्सा साल आंता.

7 अदुनहाटीं ओन्क इंका सिक्सा हियाका, मापि कीसि, समजांचदु. अल्हा कियाकोंटे ओर इंका एक्को रंदि कीसेक मनंतोर.

8 अदुनहाटीं मिमेट ओनपोरों एक्को पावरमतुन हुप्सट इंचि मीक विनंति कीसेक मंतन.

9 मिमेट नना वेहता अन्नि पोल्लेने ताकंतिरा, ताकिरा इंचि मीकुन परिक्सा कीसि ह्ळालयगुडा अद सिट्टि रासतन.

* 2:3 पौलस कुरेंति कलिसियातोक मूड सिट्टि रासतोर, रोंडो सिट्टि दोर्काहिल्ले, अद सिट्टि इत्तेने गायब आता सिट्टि आंद.

10 मिमेटे बोनन्ना मापि कीते ओन ननागुडा मापि कीतन, नना बतलयते मापि कीतानो किरिस्तुना मुन्ने मीवाहाटी मापि कीतन.

11 मापि कियार्कोटे देय्यम बस्केनना तकलिप हिय्या परांता. बारित्ते दाना गुनम बसोटदो मनक एरपाटे मंता.

पूना करारता सेवाकुल्क

12 नना बस्के अय्ते किरिस्तुना बारेमता बेसता कबुर वेहालय त्रोआस सहरते होत्तनो, अस्के सामिनाहेंदाल नाकु हरि प्पुटा.

13 ना तम्मुर तीतु अगा कलिया हिल्लोर, अय्ते ना मनसुंक सांति दोर्काहिल्ले. अदुनहाटी दांतन इंचि ओर्कु वेहचि, मेसिडोनिया एरियाते पेय्सि होत्तन.

14 पेनदुक दन्यवाद आयि! अद किरिस्तुनलोप्पो मनाकुन बस्केळ्क गेल्सागोटसेक ओता आनि गमा-गमा गब्बुनसोटा दाना तेल्वितुन मनाहेंदाल अन्नि जेगाने पैलांचंता.

15 बारित्ते मुक्ति दोर्कानोरा लोप्पो आनि नासडेम आयानोरा लोप्पो मनम पेनदाहाटी किरिस्तुना बेसता गब्बु आंदुम.

16 नासडेम आयानोराहाटी हामुर गब्बुलेसीं मंतोम आनि मुक्ति दोर्कानोराहाटीं पिस्वरता बेसता गब्बुलेसीं मंतोम. इसोटा कबळ कियानालायक बोर मंतुर?

17 बोर अय्ते पेनदा पोल्लें वेहचि सतता पायदा कीकुंतुर, असंटा वेल्लेटोरवेटाल मोमोट हिल्लोम. गानि मोमोट सत्तेम मनसुने, किरिस्तुना अदिकारमते पेनदा पोल्लें वेहासेक मंतोम. माकुन लोहता पेन माकुन हळसेक मंता इंचि माक एरपाट मंता.

3

पूना करारता सेवाकुल्क

1 मावद मोमोटे मर्रा पेद्दातनम वेहकुंचेके मंतोम इनकुंचंतिरा? हिलाकोटे वेंरेतोर्कुंक अव्सरम मत्ताप माकगुडा मीवाहाटी सिपारिस सिट्टिं मिहगा तरमळ, मिहागटाल एतमळ अव्सरमा?

2 मावा सिट्टिं अय्ते मिमेटे आंदिर, अद मावा मनसुने रासि मंता, अदुन अंतोर एरपाट कीतुर, हदवंतुर.

3 निजमे, मिमेट माहेंदाल हीता किरिस्तुना सिट्टि आंदिर इंचि अंटोर्क दिस्सेक मंतिट. अद साइते आयो गानि जीवाते मंदना पेनदा आत्माते रासि मंता, अद पर्पु बंडनपोर्रो आयो गानि मनकना मनसुनपोर्रो रासि मंता.

4 किरिस्तुनाहेंदाल माकु पेनदापोर्रो इसोंटा बरोसे मंता.

5 मावद मोमोटे बदाना पोल्लेता विचारम कियानालायक हिल्लोम, गानि इवुन कियाना बलम पेने माकु हीसेक मंता.

6 पेन माकुन पूना करारता सेवक आयाना लायकगुडा कीता. अद करार मूसाना नियमते रासि मत्ताप आयो गानि, पेनदा आत्माताहेंदाल मंता. मूसाना नियम हामुरतेके ओता गानि पवित्र आत्मा पिस्वरताहेके ओता.

पूना करारता महिमा

7-8 पर्पु बंडनपोर्रो पेन दाना नियमकुन रासि मूसांक हीता, अस्के अवुन ओर इस्राएल लोकलुकुक हियनैके ओना मोकम पेनदा महिमाता वेल्गुने निंडिसि मत्ता. गानि अद वेल्गु तक्को आयानैकेगुडा ओर ओना मोकमतुन हळा पराहिल्लुर. इल्हा हामुरताहेके ओयाना मूसाना नियमता महिमाता वेल्गु इच्चोर मत्ता अयते, पेनदा आत्माता महिमाता वेल्गु इंका बच्चोर पेद्दा मनंता.

9 बारित्ते सिक्साहेके ओयाना मूसाना नियमे अच्चोर महिमाता वेल्गुने मत्ता, अयते मनकालोर्कुन नीतिमंतुल्क कियाना नियमते दानकन्ना इंका बच्चोर महिमाता वेल्गु मंदार.

10 इंदकेटा महिमाता वेल्गु, मुन्नेटा महिमाता वेल्गुंकन्ना बच्चोरो एक्को मंचि अद हिल्ले इत्ताप आता.

11 तक्को आसेके होनानदुना महिमाता वेल्गु इच्चोन मत्ते, इंका बस्केळ्क मनानदुना महिमाता वेल्गु बच्चोन वेल्ले मंदार!

12 अदुनहाटी इदे आसेता हेंदाल मनम बच्चोरो दैरनेमते वळ्कंतोम.

13 इस्राएल लोकलुकुक तक्को आयाना महिमाता वेल्गुन हळा मनि इंचि मूसाल ओना मोकमपोर्रो मुस्कु वाटकुनुंदुर, गानि मनम ओरालेसी मुस्कु वाटकुन्नोम.

14 इस्राएल लोकलुकुना मनसुक गट्टिगा आसि होत्तां. इव रोजकुनेगुडा बस्के अयते ओर पळाना नियम हदवंतुर, अस्के अदे मुस्कु ओरा मनसुन मुच्चंता. सिराप किरिस्तुनपोर्रो विस्वासम इरते, किरिस्तुए ओरा मुस्कुकन तेंडा परांतोर.

15 निजमे, इंदकेगुडा मूसाना पुस्तकम हदवंतुर अयते मुस्कु वाटताप अव पोल्लेना अर्तम तेळियो.

16 गानि बस्के अय्ते ओरा मनसु सामिनहेके तिरियार, अस्के सामि ओरा मुस्कु तेंडसि ओर्क तेळियाना बुद्धि हिय्यानुर.

17 सामि अय्ते आत्मा आंदुर. बगा अय्ते सामिना आत्मा मंता, अगा बोना कय्दा हिळु हिल्लोम.

18 मनम अंटोरम अद मुस्कुन तेंडसि पोहतोम, इंदके अदू दमते हळताप सामिना महिमाता वेल्गुन हळसेक मंतोम. ओना आत्मा मनालोप्पो मत्ताहाटीं ओनालेसींगे मनम मारियसेके मंतोम.

4

पौलसना सेवाता बारेमते

1 पेन मापोर्री दया कीसि, दाना पोल्ले वेहाना इद सेवा माक हीता, अदुनहाटीं मोमोट दैरनेमते वेहांतोम.

2 सिगु होनानव आनि मक्किस् कियाना कबाहकुन मोमोट होळसीतोम. इंकावरोन दोका हियमळ आयि, पेनदा पोल्लेतुन उल्टा-पल्टा कीसि वेहमळ आयि इसौंटा कबाहक किय्योम. गानि पेनदा मुन्ने सल्लेम पोल्लेतुन वेहाना हेंदाल, मोमोट बसंटोरम इंचि हरेक मनकंक ओरा मनसुने तेळियंता.

3 मना बेसता कबुरगिंटा मुस्कु वाटताप मनानय्ते, अद नासडेम आयानोराहाटींगे मंता.

4 किरिस्तु पेनदा रूपम आंदुर, ओना महिमाता बेसता कबुरता वेल्गुन हळा मनि इंचि ई दुनियातोरा पेन विस्वासम कियवोरा मनसुन हीकट कीसि पोहता.

5 अदुनहाटीं येसु किरिस्तु सामि आंदुर, ओनाहेंदाले मोमोट मी सेवाकुल्लुकुम आंदुम इंचि प्रचार कीतोम, गानि मावा बारेमते मोमोट प्रचार कीकुन्नोम.

6 बारित्ते, “हीकटताल वेल्गु आयि” इंचि पेने इत्ता. मनम येसु किरिस्तुना मोकमते दिस्सना पेनदा महिमाता तेल्चितुन एरपाट कियागोम इंचि मनाकुन इदे वेल्गुने मना मनसुने मेसांगोटता.

7 मनालोप्पो मंदना इद वेल्गु पेद्दा दनमलेसी* मंता. गानि ई दनमतुन तोळिता अळकातसौंटा मना मेंदुल्लुकुने पेने इरता. इदुनहेंदाल ई वेहा परवच्चो ताकत मनद आयो गानि पेनदाहेंदाल मंता इंचि माकु तेळियंता.

* 4:7 दनम इंगे दनम इत्ते पेनदा तेल्चि. विस्वासुल्लुकुं अण्पजेपता बेसता कबुर.

8 माकु नालुं मूलानाल आपत्ति अय्ते वांतां, गानि आपत्तिते अर्सि होन्नोम, वेल्लेने मल्कां गाबर आंतोम, गानि आसे हिल्वाप मन्नोम.

9 लोकुल्क तकलिप अय्ते कीर्तुर गानि पेन माकुन होळसो. पगातोर हिळु अरहंतुर गानि नासडेम आयोम.

10 येसुना पिस्वर मावा मेंदुल्ले दिस्सागोम इंचि येसुना हामुटुन बस्केळ्ळ मा मेंदुल्ले पीसि तिरियंतोम.

11 येसुना पिस्वर मावा हायाना मेंदुल्ले दिस्सागोम इंचि मोमोट पिस्सि मंचिगुडा बस्केळ्ळ येसुनाहाटीं हामुरता कय्दे मनंतोम.

12 अदुनहाटीं मावा लोप्पो हामुर, मीलोप्पो पिस्वर कबळ कीता.

13 दर्मसास्त्रमते, “नना विस्वासम कीतन, अदुनहाटीं वळ्ळकतन” इंचि रासि मत्ताप मोमोट विस्वासम कीतोम, अदे विस्वासमता आत्मा मावा लोप्पो मंता इंचि मोमोट वळ्ळकतोम. बारित्ते अदे विस्वासमता आत्मा मावा लोप्पो मंता.

14 बारित्ते, सामि येसुन जीवाते तेहता पेने मोमोट येसुना लोप्पो कलियसि मत्ताहाटीं माकुनगुडा जीवाते तेहंता आनि मीवातोनि माकुनगुडा दाना मुन्ने निप्संता इंचि माक एरपाटे मंता.

15 पेनदा कुर्या वेल्लेटुर लोकुल्कुनगा एवसि, दाना महिमा कियालय एक्कोते-एक्को दन्यवाडल्क वेहाना पारतनां बेर्सगोम इंचि इवन्नि मीवाहाटीं मंतां.

16 अदुनहाटीं मोमोट दैरेनेम होळसोम. मावा मेंदुल पलाताल जिग्गि हिलाकोंटा आसेके मंता, गानि लोप्पो मंदना आत्मा मात्रम रोज पूनगा आसेके मंता.

17 बारित्ते, माकु गळसेमताहाटीं वायाना तकलिपकु, मावाहाटीं मोमोट विचारम किय्योम अच्चोर अब्सरम आतव आनि बस्केळ्ळ मंदना महिमातुन तयार कीतां.

18 अय्ते इंदके मोमोट दिस्साना वस्तुकुन पोर्गे आयो, गानि दिस्सुवा वस्तुकुन पोर्गे नदर वांटोम. दिस्सना वस्तुक गळसेम मनंतां, दिस्सुवा वस्तुक बारे बस्केळ्ळ मनंतां.

5

मावा स्वर्गमता लोन

1 बूमिपोर्गे मंदना लोतालेसीं मावा मेंदुल मंता. अद लोन नासडेम आतस्के माकु मनालय स्वर्गमते लोन मंता, अद बस्केळ्ळ मंदना लोन मनकल तयार कीतद आयो, गानि पेने कीता इंचि माकु एरपाटे मंता.

2 इंदकेटा लोतसोंटा मेंदुल्ले मोमोट नेर्बळतोम, अदुनहाटीं स्वर्गमता लोतुन केरानाहाटीं वेल्ले तनलाळंतोम.

3 बारिल्ले इदुन केर्तस्के मोमोट कुळकें दिस्सोम.

4 मोमोट इद बूमिपोरोंटा मेंदुल्ले मत्तच्चोरजेम बर्वुने तन्लाळसेक मनंतोम, इद मेंदुल्लुन होळसीयगोम इंचि आयो, गानि हायना मेंदुल बस्केळ्ळक पिस्साना मेंदुल्ले मारियागोम इंचि मोमोट कोरसेक मंतोम.

5 इदे मेंदुलताहाटीं पेन माकुन तयार कीता. इद गेरांति इंचि मावा लोप्पो पवित्र आत्मातुन हीता.

6 अदुनहाटीं बस्केळ्ळक दैरनेमते मनंतोम. मोमोट मेंदुल्ले मत्तच्चोरजेम सामिनगटाल लक्कु मंतोम इंचि माकु एरपाटे मंता.

7 बारिल्ले मोमोट ह्ळसि आयो गानि सामिनपोरों विस्वासम कीसि ताकंतोम.

8 मोमोट दैरनेमते मनंतोम, मेंदुल्लुन होळसिसि सामिनतोनि मनमळे बेस इनकुंतोम.

9 अदुनहाटीं मोमोट इद मेंदुल्ले मनना, मनाकोन्ना, सार्मिक इस्टाम वाताप ताकमळे मावा उद्देसम.

10 बारिल्ले मनक अंतोर्क किरिस्तुना न्यायम कियाना राजगद्दे मुन्ने नित्ताना मंता. मनागटाल हरेक मनकंक मनम कीता बेसता कबाहक आयि, कराब कबाहक आयि अवुना हिसाबते इनाम हिलाकोटे सिक्सा दोर्कता.

मोमोट किरिस्तुना राजदूतकुम

11 पेनदुक वेरियसि बल्हा पिस्सना इद माक तेळियंता, अदुनहाटीं इदुन मोमोट लोकल्लुकुं वेहांतोम. मोमोट बसंतोरम इंचि मावा बारेमते पेनदुक पूरा एरपाटे. इव पोल्लें मीवा मनसुना लोप्पोगुडा एरपाट आता इंचि नावा आसे मंता.

12 मोमोट बेसतोरुंम इंचि मर्रा मी मुन्ने वेहकुंचेके हिल्लोम, गानि इच्चुर लोकल्लक मनसुने मत्ता पोल्लें आयाका पलाताल दिस्साना पोल्लेना बारेमते पेद्दिरेकेम कीतुर, ओराहाटीं मावा बारेमते वेहालय मीक जवाब गावाले इंचि वेहासेक मंतोम.

13 माकुन गिंटा बोरन्ना पिस्सालोर इंचि इत्ते, पेनदाहाटींगे आतोम. बोरन्नागिंटा माकुन बेसता बुद्दिदितोर इंचि इत्ते मीवाहाटींगे आतोम.

14 किरिस्तु अंटोराहाटी हातोर इंचि मोमोट विस्वासम कीतोम. इंका मावा अंटोरा पळाना पिस्वरगुडा हाता इंचि विस्वासम कीतोम. अदुनहाटी किरिस्तुना पावरम माकुन ओप्केते इरसेक मंता.

15 अद बल्हा इत्ते, इंदकेटाल पूना पिस्वर पिसानोर ओर सतताहाटी आयो गानि ओराहाटी बोर अय्ते हासि जीवाते तेदतोर ओनाहाटी पिसागोम, अदुनहाटीगे ओर अंटोराहाटी हातोर.

16 अदुनहाटी इंदके मोमोट मनकना विचारम मत्ताप ह्ळना आयो. मोमोट किरिस्तुनगुडा मनकना विचारम मत्ताप ह्ळसि मत्तोम, गानि इंदके ओन अलग नदरते ह्ळांतोम.

17 बल्हा इत्ते, इंदके बोर अय्ते किरिस्तुने मंतोर, ओर पूना मनकल आतोर. पळाना पिस्वर होत्ता, पूना पिस्वर सुख आता.

18 इवन्नि पोल्लें पेनदाहेंदाले मंतां. पेने मनाकुन किरिस्तुनाहेंदाल दानतोनि कल्पिसि माकु कल्पना सेवा अप्पजेपता.

19 अद बल्हा इत्ते, लोकुल्लुकुना पापाल्क लेक्का पिय्याकेन, ओर्कुन किरिस्तुना हामुरताहेंदाल दानतोनि कल्पता. इल्हा कल्पना पोल्लेतुन लोकुल्लुकुनगा ओयालय माकुन निल्हाता.

20 अदुनहाटी मोमोट किरिस्तुना राजदतकुम आंदुम. मावाहेंदाल पेन मीक वेहासेक मंता इनकुंदु. मिमेट पेनतोनि कलियसि मंदना इंचि किरिस्तुनाहेंदाल मोमोट मीक विनंति कीसेक मंतोम.

21 मनम किरिस्तुनाहेंदाल पेनदा लोप्पो नीतिमंतुल्क आयागोम इंचि मना बदलाते मना पापाल्कुनाहाटी पापम कियवा किरिस्तु मोक्कु आतोर.

6

1 मोमोट पेनतोनि कलियसि कबळ कियानोर्कुम आताहाटी मीक विनंति कीसेक मंतोम, मीक दोर्कता पेनदा कुर्पातुन एर्तम आया हियमटु.

2 बारित्ते पेनदा दर्मसास्त्रमते, “बेसता वेलाते नना नीवा पोल्ले केंजतन, मुक्किता रोजुने नना नीकु सहाय्यम कीतन,” इंचि रासि मंता. हुळाट, बेसता वेला इदे आंद, इदे मुक्किता रोजु आंदु.

3 मावा सेवाते बतले तप्पु जर्गामन्नि इंचि, बदे पोल्लेते इंकावरोंक अड्डम ताकोम.

4 गानि अग्नि पोल्लेने मोमोट पेनदा बेसता सेवाकुल्लुकुम आंदुम इंचि हुपिच्चेक मंतोम. ओप्केते, बादाने, कस्टाल्लुकुने, तकलिपकुने,

5 देब्बां तिनमळते, जेलते होनमळते, मावा विरोदमते लोल्लिं आयमळते, कस्टम कियमळते, निद्र हायमळते, उपासमते,

6 पवित्र मनमळते, तेल्विते, ओर्सकुनमळते, दयाते, पवित्र आत्माते, कपटम इर्का पावरम कियमळते,

7 सत्तेम पोल्लेते, पेनदा ताकतते, नीतिता आयदार्क तिना कय्दे, रोड्डा कय्दे पीसि,

8 इंकावरोर माकुन कदर हिथ्यिना-हिय्याकोन्ना, बेसतोर इन्निना-इन्नाकोन्ना, माकुन नळेह कियानोर इंचि इंतुर गानि मोमोट सत्तेमतोर्कुम आंदुम.

9 एरपाट कियवोरालेसीं मनना, अंटोर एरपाट कीतुर. हायानोरालेसीं मनना, जीवाते मंतोम. माकु सिक्सा हियाना गानि मोमोट हाया हिल्लोम.

10 मोमोट दुक्कमतेगुडा बस्केळ्ळक आनंदमते मंतोम, मोमोट गरिब मनिनागानि वेल्लेटोर्कुन पेनदा लोप्पो सिरमंतुल्क कीतोम. महगा बतल हिलाकोन्ना गानि अग्नि मत्तापे मंतोम.

11 कुरेंति सहरतोरिता! मोमोट अग्नि पोल्लें मीक कुल्लम-कुल्ला वेहतोम, मीहाटीं मावा मनसु कुल्ला मंता.

12 मोमोट मीकुन लक्कु इरसेक हिल्लोम, गानि मिमेटे मावा दग्गेरा वायालय हळसेक हिल्लिर.

13 मोमोट कीतापे मिमेटगुडा मीवा मनसुन कुल्ला कीम्टु. इद नना मीकुन नावा पिलाल्क इंचि वेहासेक मंतन.

विस्वासुल्क, अविस्वासुल्क उंदि आया पर्रै

14 विस्वासम कियवोरतोनि मिमेट जोडि आयमट्टु. बारित्ते नीतितद आनि नीति हिल्वद इव बल्हा कलिया परांतां? वेल्गु आनि हीकट बल्हा दंटा आया पर्रैता? आया पर्रै.

15 किरिस्तु आनि देय्यम उंदि बल्हा आया परांतुर? विस्वासिक अविस्वासिनतोनि बता पोत्तु?

16 बोम्मांक, पेनदा गुळिकु बाता संबंदम? बारित्ते मनम अय्ते जीवाते मनना पेनदा गुळि आंदुम. पेनदा दर्मसास्त्रमते, “नना ओरा लोप्पो मनंतन, ओरतोनि तिरियंतन, नना ओरा पेन आसि मनंतन, ओर नावा लोकुल्क आयानुर,” इंचि रासि मंता.

17 पेन इल्हागुडा इंता गदा, “विस्वासम कियवोरागटाल पेय्सट, अलग आम्ट, सापसुतरा हिल्ला वस्तुकुन इटमट, अस्के नना मीकुन ओप्कुंतन.

18 नना मीवा बाबान आकन, मिमेट नावा मर्क-मियाह्क आकिट इल्हा पेद्दा सक्तिमंतुड पेन इंता,” इंचिगुडा रासि मंता.

7

1 पावरमगल्लोरिता! पेन हीता इव पोल्लें मनकगुडा दोर्किसे मंतां, अदुनहाटीं मनम मना मेंदुल्क, आत्माक अंट्रिस मत्ता मुर्कितुन नोर्सिं साप कीकोम, पेनदुक वेरियसि पूरा पवित्र आसेके दाकोम.

2 मीवा मनसुने मावाहाटीं जेगा हीम्ट. मोमोट बोनतोने अन्यायम किया हिल्लोम, बोने बोंकिच्चा हिल्लोम, बोनाहेंदाल गलत पायदा एता हिल्लोम.

3 नना इल्हा इंचि बतल मीवापोर्रीं तप्पु दोस्सेक हिल्लेन. मिमेट मावा मनसुने मंतिट, मोमोट हायिना, पिस्सिना मीवातोने मनंतोम इंचि नना मुन्नेने वेहतन.

4 नना मीवातोनि बतले मक्किचाकोंटा वेहासेक मंतन, नाक मीपोर्रीं एक्को पेद्दिदरेकेम मंता. नना सांतिते निंडतन. मावा अन्नि तकलिपकुनेगुडा नना वेल्ले कुसिते मंतन.

पौलुस कूस आयमळ

5 मोमोट मेसिडोनिया एरियाते वातस्केगुडा मावा मेंदुल्कु सुकम दोर्काहिल्ले, गानि नालुं मूलानाल तकलिपके-तकलिपकु मनुंदु, पलाताल जगडाल्क आनि लोप्पोटाल वेंरिते निंडिसि मत्तोम.

6 अयना गानि कमजोर मत्तोर्कुक दैरनेम हिय्याना पेन तीतुन महगा लोहचि माक दैरनेम हीता.

7 सिराप ओर वाताहेंकेन आयो गानि मीहेंदाल ओनकु दोर्कता आ दैरनेमता हेंदालगुडा. ओर नावापोर्रीं मत्ता मीवा इच्चाना बारेमते, दुक्कमता बारेमते, जोसता बारेमते वेहतोर. अदुनहाटीं नना इंका एक्को आनंदमते मंतन.

8 नना सिट्टिट रासि मीकुन दुक्कमते अरहतन. मुन्ने ननागुडा दुक्कमते मत्तन गानि इंदके हिल्लेन, अद दुक्कम गळसेमताहाटींगे मत्ता.

9 इंदके नना आनंदमते मंतन, मीकुन दुक्कमते अरहतन इंचि आयो, गानि मीवा दुक्कमता हेंदाल मिमेट मनसु मार्सकुत्तिर इंचि. इवन्नि पेनदा इच्चा मत्तापे आतां इंचि मीक माहेंदाल बतले नुकसान आयाहिल्ले.

10 बारित्ते पेनदाहेंदाल वायाना दुक्कम, मनसु मार्सकुनागोटसि मुक्तिताहेके औता, ई दुक्कमते नाराज हिल्ले. गानि ई दुनियाता दुक्कम हामुरताहेके औता.

11 निजम हळते, पेनदाहेंदाल वाता दुक्कम बक्तिते मनालय मीकुन बच्चोनो बदलांचता. मीलोप्पो बच्चोनो जोस, सत्तेमतोरम इंचि हपुसमळ, अन्यायमता विरोद कियमळ, वेंरिते मनमळ, नाकु कलियानाहाटीं मीवा जीवा बागाने तन्लाळमळ, सेवाता इच्चा, तप्पु कीतोन सिकसा कियमळ. इवन्नि पोल्लेने मीलोप्पो तप्पु हिल्ले इंचि मिमेट निजम कीसि हपिस्तिर.

12 नना मुन्ने लोहता सिट्टिते, बोर तप्पु कीतोर? बोन्क अन्यायम जर्गता? इंचि ईराहाटीं रासा हिल्लेन. गानि पेनदा मुन्ने मिमेट माकुन बच्चोन बेस हळकुंतिर इद मीक तेळियागोम इंचि रासि मत्तन.

13 अदुनहाटीं माक सांति दोर्कता. मीवा अंटोराहेंदाल तीतुना जीवा कूस आसि आनंदम आतोर. ओना आनंदम हळसि मोमोटगुडा वेल्लेने आनंदम आतोम.

14 नना ओनतोनि मीवा बारेमते पेद्दिदरकेम वेहकुत्तन. मोमोट मीक वेहतव अन्नि पोल्लें निजमे आंदुं. अदुनहाटीं तीतुना मुन्ने नावा पेद्दिदरकेम निजम कीसि हपिस्तिर, नाकुन सिग्गु होननाल किया हिल्लिर.

15 मिमेट अंटोर तीतु वेहताप नावा आदेसतुन केंजतिर, वेंरिते, कदर हीसि ओनकु कलियतिर. इद मति वातस्के मुन्नेटकन्ना इंका एक्को ओना पावरम मीवाहाटीं बेर्सीता.

16 अन्नि पोल्लेने मीपोर्री नाक बरोसा मंता, इद नावाहाटीं कुसिता पोल्ले आंद.

8

गरिब विस्वासुल्क एक्को दानम कियमळ

1 विस्वासुल्कुनिटा! मेसिडोनिया एरियाता कलिसियातोकुंक पेन कीता कुर्पाता बारेमते मीक वेहसेक मंतोम.

2 अद बल्हा इत्ते, ओरापोर्री वेल्लेने तकलिपकुना परिकसां वातां, ओर वेल्लेने कूस आनि गरिब आसि मत्तुर. अयना गानि लोकुल्कुंक हिय्याना सहायम वेल्लेन बेर्सीता.

3 ओरा बारेमते ना गवाइ इदे गदा, ओर बच्चोर हिय्या पतुर् अचोने आयो गानि, दानकन्ना एक्को कुसिते हीतुर.

4 पेनदा लोकुल्कुन सहायम कियाना सेवाते माकुनगुडा कलियालय दया कीम्टु इंचि ओर मावातोनि ऊके-ऊके वेल्ले विनंति कीतुर.

5 मोमोट आसे पळसि मत्ता दानकन्ना एक्को ओर कीतुर. ओरा पिस्वरंता पेनदाहाटीं हीतुर, आनि पेनदा इच्चा मत्ताप मावाहाटींगुडा हीतुर.

6 इल्हा सहायम कियमळ मुन्ने तीतुए मीलोप्पो सुख कीतोर, अय्ते अदुन महना कबळगुडा किथ्थिर इंचि ओन विनंति कीतोम.

7 मिमेट विस्वासमते, पोल्लेने, तेल्विते, अन्नि तीस्कुने कोसिस कियमळते आनि मावा पोर्गे मिमेट कियाना पावरमते बेर्सेक मंतिट. अल्हेने दानम कियाना कबळतेगुडा बेर्सेक होंदना.

8 नना मीक आदेस हीसेक हिल्लेन, गानि कळमता विस्वासुल्क इद कबळते उसारते मंतुर, ओराच्चोन मिमेटगुडा निजम पावरम कीसेक मंतिरा इंचि परिक्षा कीसि हळसेक मंतन.

9 मना सामि येसु किरिस्तुना कुर्पा बच्चोर पेद्दादि मीक एरपाटे मंता. ओनगा अन्नि मंचिगुडा मीवाहाटीं गरिब आतोर. ओना गरिबतनमताहेंदाल मिमेट दनवंतुल्क आयना इंचि ओर अल्हा आतोर.

10-11 इगे नना वेहाना पोल्ले इदे गदा, निरिटाल कोत्तां जमा कीसि हियमळ मोदाला मिमेटे सुख कीतिर, अद कबाटुन महमळ मीक बेस मनंता. बारित्ते, कोत्तां जमा कियाना इंचि बल्हा अय्ते मीवा इच्चा मत्ता, अल्हा मिमेट हिय्या पतचो जमा कीसि अद कबाटुन पूरा कीम्टु.

12 कोत्तां हिय्याना इंचि मीवा इच्चा मत्ते, मिमेट बच्चोन हीतिट, अद पोल्ले आयो गानि, मिमेट पूरा मनसुनाल हीते पेन अदुन ओप्कुंता.

13 इंकावरोना बर्वुन अल्कगा कियानाहाटीं मिमेट बर्वु कांजना इंचि नना इंचेक हिल्लेन गानि इव्वुर समानम मंदना.

14 इंदकेटा वेलाते मिहगा अन्नि मंता, अय्ते हिल्वोरा अव्सराल्कुने कबळक वायमळ गावाले. पजा उंदि वेला मिहगा हिल्वस्के ओर मीवा अव्सराल्कुने कबळक वायमळ गावाले, इल्हा इव्वुरगुडा समानम आंतिर.

15 इदुना बारेमते दर्मसास्त्रमते,

“वेल्ले जमा कीतोनागा, वेल्ले मिग्ला हिल्लें,
तक्को जमा कीतोनागा, तक्को होन्ना हिल्लें,”
इंचि रासि मंता.

तीतु आनि ओना दंतातुर

16 मी बारेमते ना मनसुने मत्ता इच्छातुन, पेन तीतुना मनसुनेगुडा पुटिस्ता. अदुनहाटी पेनदुक नना दन्यवाद कीतन.

17 मोमोट तीतुन मीहेके लोहालय विनंति कीतस्के ओर अद पोल्लेतुन ओप्कुंकि कुद कुसिते मिहगा बायालय तयार आतोर.

18 अल्हेने तीतुनतोनि अन्नि कलिसियाने बेसता कबुरतुन वेहालय पोरोल पेय्सतोर वरोर दादनगुडा लोहसेक मंतोम.

19 अचोने आयका, इद चंदातुन मोमोट येस्सलेम ओयानेंके ओन मातोनि लोहना इंचि कलिसियातोर पेरतुर. मोमोट सामिना महिमाताहाटी आनि मावा सहायम कियाना जिद दिस्सनाहाटी इद चंदा ओसेक मंतोम.

20 ई जमा कीता चंदाता जिम्मेदारि मावा पोर्री मत्ताहाटी, माकुन बोरे तप्पु इनामन्नि इंचि उसारते ताकसेक मंतोम.

21 सिराप पेनदा मुन्नेने तप्पु हिल्लाप आयो, गानि मनकालोरा मुन्नेगुडा तप्पु हिल्लाप मंतोम.

22 अल्हेने ओरतोनि मोमोट इंकावरोन मना दादन लोहासेक मंतोम. आ दादन मोमोट बच्चुंगो मल्कां परिकसा कीसि हूळतोम, ओर वेल्लेने पोल्लेने बेस मंतोर. ओर मीवापोर्री वेल्लेने बरोसा कीताहाटी, मीक इंका वेल्लेने सहाय्यम कियाना ओना इच्छा मंता.

23 ओक्कला बोरन्ना तीतु बोर आंदुर? इंचि पूसकीते, ओर नावा दंटातोर, नावातोनि कलियसि मीवा सेवा कियानोर आंदुर, इंचि वेहट. इंका विस्वासि दादालोरा बारेमते पूसकीते, ओर कलिसियातोर लोहचीतोर आनि किरिस्तुना कदरगल्लोर आंदुर, इंचि वेहट.

24 अदुनहाटी मिमेट ओर्कुन बच्चोन पावरम कीतिट इंचि कलिसियाता मुन्ने हुप्सट, अल्हेने मीवा बारेमते मोमोट पेद्दिरेकेम वेहकुत्तद निजम कीसि ओर्कु हुप्सट.

9

कुसिते दानम हियाना इंचि पौलुस वेहमळ

1 इंदके यहूदिया राज्येमता पेनदा लोकुल्कुनाहाटी कियाना ई सेवाता बारेमते मीक रासाना अक्सरम हिल्ले.

2 बारित्ते सहाय्यम कियालय मिमेट बस्केळक तयार मनंतिर नाक एरपाटे मंता. नना मीवा बारेमते, अकाया एरियाता लोकुल्क उंदि वर्साताल चंदा हियालय तयार

मंतुर इंचि मेसिडोनियाता लोकुलकुंक पेदिदरेकेमते वेहुंदुन. इद केंजसि वेल्लेटुर लोकुलक चंदा हियालय तयार आतुर.

3 नना मीवा बारेमते पेदिदरेकेम वेहता पोल्लें एर्तम आयामान्नि इंचि ई दादालोर्कुन लोहसेक मंतन, नना वेहतापे मिमेट चंदा तयार कीसि ईरट.

4 मिमेट अल्हा तयार कीसि ईरकोटे, मेसिडोनियातोर बोरन्ना नावातोनि वासि तयार हिल्वद हळते, मीवापोरें बरोसा कीताहाटी मावा सिग्गु होनना वेला वायार. मीवदगुडा सिग्गु दांता इनमळ अक्सरम हिल्ले.

5 अदुनहाटी मिमेट चंदा हीतोम इंचि मोदाले पोल्ले हीसि मत्तिर. अय्ते आ चंदा मिमेट तयार कीसि ईरट इंचि बतिमलाडालय ई दादालोर्कुन मुन्नेने मिहगा लोहमळ नना अक्सरम इनकुत्तन. ओर वाता पजा जबरदस्तिते आयो गानि, मीवा मनसुनाल हियमळ गावाले.

6 इद पोल्ले मति ईरट: इच्चुन वीततोर इच्चुने पंटा कोय्यंतोर, वेल्ले वीततोर वेल्लेने पंटा कोय्यंतोर.

7 अदुनहाटी गुल्गामान्नि, जबरदस्ति कियामान्नि हरेक मनकल बल्हा हीतन इंचि विचारम कीतोरो, अल्हेने हिय्याना. अल्हा आनंदमते हियानोन पेन पावरम कीता.

8 मिमेट अन्नि बेसता कबाहक कियालय, मीक अक्सरम मत्तव अन्नि मिहगा बस्केळक मंदालय, पेन दाना दयाते अव अन्निन हिया परांता.

9 इदुना बारेमते दर्मसास्त्रमते,

“ओर गरिबोर्कुंक अन्समन्स कियाका हीतोर,

ओना नीति बस्केळक निल्सि मनंता,”☆

इंचि रासि मंता.

10 अदुनहाटी वीतानोंकु पेन विज्जां हीता, तिनालय तिडि हीता. अद मीक वेल्ले विज्जां हीतस्के मीवा नीतिता पलम बेरसंता.

11 मिमेट बस्केळक अन्समन्स कियाकोटा हियालय पेन मीकुन अन्निटवुने गट्टिगा कीता. अल्हेने मिमेट मावा कय्दे चंदा लोहतित इंचि वेल्लेटुर पेनदुक दन्यवाद कियानुर.

12 मिमेट कियाना सहायमता सेवाहेंदाल पेनदा लोकुलकुना अक्सराल्क पूरा आंतां, अचोने आयाका ओराहेंदाल पेनदुक वेल्ले दन्यवाद आसेक मनंता.

13 बारिते मिमेट इद सेवा कीसि, किरिस्तुना बेसता कबुरतुन ओष्कुंचि अद मत्ताप ताकसेक मंतिर. अचोने आयाका पेनदा लोकुल्लुकुं, वेरे अंटोर्कुंकी मीवा मनसुनाल सहायम कीसेक मंतिट. इदुन हळसि ओर पेनदा महिमा कीतुर.

14 मीवापोर्रो पेनदा कुर्पा वेल्लेने मंता, अदुनहाटीं ओर मीकुन हळना इंचि तनलाळसेके ओर मीवाहाटीं वेल्लेने पावरमते पारतना कीतुर.

15 पेन हीता वेहा परवच्चो वरमताहाटीं दानकु दन्यवाद आयि.

10

पौलुस ओना सेवाता बारेमते वेहमळ

1 नना पौलुसुन, मीवातोनि मननेंके सिन्नागासि मनंतन, गानि लक्कु मननेंके वेरे हिलाकोंटा मनंतन इंचि इच्चुर इंतुर. नना मीकु किरिस्तुना सादा-सिंपल आनि मेत्तटा गुनमता हेंदाल विनंति कीसेक मंतन,

2 नना वातारिते बोर अय्ते माकुन, “दुनियातोरालेसीं ताकसेक मंतुर” इंचि इनकुंतुर, ओरतोनि नाक कडक वळ्ळकाना वेला वायामान्नि इंचि विनंति कीसेक मंतन.

3 निजमे, मोमोट दुनियातोरालेसीं मंतोम, गानि दुनियातोरालेसीं लडाइ किय्योम.

4 मोमोट लडाइ कियाना विस्सें दुनियातोरसंटव आयो, गानि किल्लान कूलाहनाहाटीं पेनदाहेंदाल ताकततव आंदुं.

5 इवुनाहेंदाल मोमोट पेनदुन एरपाट कियालय बतां अय्ते आपंतां, अवुन अन्निन नासडेम कीतोम, ओरां अन्नि विचाराल्कुन मिळाहचि किरिस्तुना इच्चा मत्ताप ताकानाल कीतोम.

6 मिमेट किरिस्तुना पोल्लेते पुरागा ताकालय आतस्के, किरिस्तुना पोल्ले केजवोर अंटोर्कुन मोमोट सिक्सा हियालय तयार मंतोम.

7 मिमेट सिराप मुन्ने मत्तवुन मीवा कळ्ळुने हळसेक मंतिट. मीक गिंटा बोर्केन्ना ओनद-ओन्क नना किरिस्तुनोन आंदुन इंचि बरोसा मनानय्ते बल्हा ओर किरिस्तुनोर आंदुर, अल्हेने मोमोटगुडा किरिस्तुनोर्कुम आंदुम इंचि ओन्क तेळियगोम

8 मीकुन नासडेम कियालय आयो गानि, मीकुन बेर्सागोटालय सामि माक अदिकारम हीतोर इंचि नना इंकागुडा पेद्रिदरेकम वेहकुनिना नाक सिग्गु हिल्ले.

9 नना बारि वेहसेक इत्ते, नावा सिट्टिना हेंदाल नना मीकुन वेराहसेक मंतन इंचि मीक अनपिच्चमान्नि.

10 बारित्ते, “ओर सिट्टिने अय्ते मजबुत आनि कडक पोल्ले रासंतोर, गानि मेंदुल्ले कमजोर मंतोर, पोल्लेगुडा बेस पेय्सों,” इंचि इच्चुर इंतुर.

11 अल्हा इनानोर्क इद पोल्ले तेळियि: मोमोट हिल्वस्के सिट्टिने बल्हा रासि वळ्ळंतोमो अल्हेने मोमोट मीवातोनि मत्तस्के ताकंतोमगुडा.

12 बोर-बोर अय्ते ओरद-ओरे पेद्दातनम वेहकुंतुर, गानि मोमोट ओरालेसी वेहकुन्नोम, ओरा लोप्पो तुलना किय्योम. ओर वरोनद वरोर कहकुंचेके मंतुर, वरोनद-वरोर तुलना कीकुंचेके मंतुर. इद पेद्दा मुर्कतनम आंद.

13 मोमोट अय्ते मावा अदिकारता पलाते बस्केने होन्नोम, गानि पेन माक हीता गेट्टुना लोप्पोने मंचि मोमोट पेद्दिदकेम कीतोम. इदे गेट्टुन लोप्पो मिमेट मंतिर.

14 मोमोटे मोदाला मिहगा किरिस्तुना बेसता कबुर तत्तोम. अदुनहाटी मोमोट पेन हीता सेवातुन गेट्टुना लोप्पोने मंचि पेद्दिदकेम कीतोम.

15 वेरेतोर कीता कबळतुन मोमोटे कीतोम इंचि पेद्दिदकेम किय्योम. बल्हा-बल्हा मीवा विस्वासम बेस्के के दांता, अल्हा-अल्हा मावा सेवा मना गेट्टुना लोप्पोने मीवाहाटी पैलांचेके दांता इंचि आसे मंता.

16 इंकावरोर कबळ कीता एरियाते होंचि पेद्दिदकेम कियाका, मोमोट बोरे होनवा एरियाते होंचि बेसता कबुर वेहंतोम.

17 गानि दर्मसास्त्रमते, “बोर अय्ते पेद्दिदकेम कीतो, ओर सामि कीता कबळतुन पीसे पेद्दिदकेम किय्यिर,”✧ इंचि रासि मंता.

18 बोर अय्ते ओनद-ओरे मेचकुंतोर ओर कबळतोर आयोर, गानि सामि बोनय्ते मेचकुंतोर ओर कबळतोर आंदुर.

11

पौलस आनि आबद्दम वेहाना प्रेरितुल्क

1 नना इच्चुर बुद्धि हिल्वोनलेसी वळ्ळिकना गानि नाकुन ओर्सकुंटु, अल्हेने मिमेट नाकुन ओर्सकुंचेकेन मंतिट.

2 मीवा बारेमते नना आसेते मंतन, इद आसे नावा लोप्पो पेनदाहेंदाले मंता. बारित्ते ओना वरोरे मंदना मांडसाता कय्दे हियालय, मरमिं आयवा पवित्र लेय्याटालेसी मीकुन किरिस्तुना कय्दे अप्पजेप्पना इंचि नाक मंता.

3 गानि तरास चालाकिते हव्वान पसांचतापे, किरिस्तुनतोनि इमानदार, पवित्र मंदना मीवा मनसुनगुडा लक्कु किय्यार इंचि नना वेरियंतन.

4 बारित्ते बोरन्नागिटा मिहगा वासि, मोमोट वेहवासोंटा वेरे येसुना पोल्ले मीक वेहते, हिलाकोंटे बदन्ना मुन्ने मिहगा हिल्वसोंटा आत्मा दोर्कते, हिलाकोंटे इंका बदन्ना मुन्ने मिमेट ओप्कुन्वसोंटा बेसता कबुर वाते, अदुन मिमेट कुसिते ओप्कुंतिर.

5 नना पेद्दा-पेद्दा प्रेरितुल्कुंकन्ना सिन्नोन इंचि इनकुंचेक हिल्लेन.

6 नना वळ्ळकमळते कमजोर मनिनागानि तेल्विते हिल्लेन. इदुन मोमोट अन्नि पोल्लेने, अन्नि तीस्कुने मीक हुपिस्तोम.

7 मीक पेनदा बेसता कबुर पुक्कटते वेहतन, मीक पेद्दातनम वायागोम इंचि, नावद नना सिन्नातनम कीकुत्तन, इद बतल पापम कीताना?

8 मीवा सेवा कियालय नना वेरे कलिसियानाहेंदाल मदत एतसि ओर्कुन लुटांचतन.

9 नना मिहगा मत्तस्के, नावा अक्सराल्कुन पूरा कियालय बोनपोरों बर्वु आसि मना हिल्लेन. मेसिडोनिया एरियाताल वाता विस्वासि दादालोर नावा अक्सराल्कुन पूरा कीतुर. इदवेरादाका नना बदे पोल्लेते मीपोरों बर्वु आया हिल्लेन, इंका मुन्नेगुडा आयोन.

10 किरिस्तुना सत्तेम नावा लोप्पो मंता, अदुनहाटीं अकाया एरियातोर बोरे नावा इद पेद्दिदरकेमतुन विरोद किया पर्स्.

11 नना मिहगाटाल मदत एता हिल्लेन इत्ते, मीपोरों नाक पावरम हिल्ले इत्तापा बतल? असले आयो! मीकुन नना बच्चोन पावरम कीतन अद पेनदुक् एरपाट.

12 ओर बतलयते कीसेक मंतुर अदे कबळ मोमोट कीसेक मंतोम इंचि बोर अय्ते पेद्दिदरकेम वेहकुंचेके मंतुर, ओर्कुन कमजोर कियानाहाटीं नना बतलयते कीतन, अदे कीसेक मनंतन.

13 बारित्ते इसोंटा लोकुल्क आबद्दम प्रेरितुल्क आंदुर. ओर आबद्दम वळ्ळंतुर, ओर इंकावरोन पसांचना कबळ कीतुर, ओर किरिस्तुना प्रेरितुल्कुनालेसीं मनंतुर.

14 इवने इचंत्रम बतल हिल्ले, देय्यमगुडा वेल्गु हिय्याना पेनदा दूतालेसीं आंता.

15 अदुनहाटीं देय्यमता सेवाकुल्कगुडा सत्तेमते ताकाना सेवाकुल्कुनलेसीं मारियते इद पेद्दा पोल्ले आयो, गानि आकिरते ओर कियाना कबळता इसाबते सिक्सा आयार.

पौलस किरिस्तुना प्रेरित आताहाटीं तकलिप अरमळ

16 नना मरी वेहसेक मंतन, नाकुन बोरे मूर्कुड इनकुनमट, मिमेटगिंटा नाकुन मूर्कुडे इनकुनानयते बतल आयो, अल्हेने ओप्कुंटु, इदुनहेंदाल नाकगुडा इच्चुर पेद्दिदरेकम कियालय दोकार.

17 नना इंदके वेहना पोल्ले सामिना विचारम मत्ताप आयो, गानि वरोर मूर्कुड वेहताप वेहासेक मंतन.

18 वेल्लेटुर लोकल्ल ओर कीता पोल्लेन पोर्गेटाल पेद्दिदरेकम वेहकुंतुर, ननागुडा अल्हेने वेहकुंतन.

19 मिमेट अथे बुद्धिद मत्तोर आंदिर, अदुनहाटीगे बुद्धिद हिल्वोरा पोल्लेन कुसिते ओर्सकुंचेके मंतरि.

20 अचोने आयाका, ओर मीकुन गुलाम किथिना, लुटांचना, मीवा पायदा येताना, ओरद-ओरे पेद्दा कीकुन्निना, मीकुन सेंपापोर्गे तनिना इवन्नि मिमेट ओर्सकुंचेके मंतरि.

21 नाक सिग्गु वायाना पोल्ले बतल इत्ते, ओर कीताप मोमोट किया हिल्लोम. गानि बोरे आयिर पेद्दिदरेकम कियालय दैरनेम कीते, ननागुडा मूर्कुनालेसीं दैरनेमते पेद्दिदरेकम कीतन.

22 ओरद-ओर इब्रि जातितोर्कुम इंचि इंतुर, ननागुडा इब्रि जातितोने. ओर इस्राएल मनकालोर्कुम इंतुर, ननागुडा इस्राएल मनकने. ओर अब्राहामुना वंसमतोर्कुम इंतुर, ननागुडा अब्राहामुना वंसमतोने.

23 ओर किरिस्तुना सेवाकुल्ल आंदुरा? नना ओर्कन्ना एक्को किरिस्तुना सेवा कियानोन आंदुन इंचि पिस्सनलेसीं इंचेके मंतन. ओर्कन्ना एक्को कस्टम कीतन, ऊके-ऊके जेलुंक होनुंदुन, देब्बां तिनुंदुन, बच्चुंगो मल्लां हायाना वेला वासि मत्ता.

24 नना हेयुं मल्लां यहुदिल्लकुना कय्दे मुप्पै तोम्मिद पोटे देब्बां तित्तन.

25 मूड मल्लां नाकुन दुड्डुने तंतुर, उंदि मल्ला बंडाने तंतुर, मूड मल्लां नावा पय्नेमते डोंगां पैतां, उंदि मल्ला नर्का-पल्लिं पिय्यल-पोळ्दु समुद्रमते मत्तन.

26 ऊके-ऊके पय्नेमते होनुंदुन. बेरेहकुना दोका, दोंगाल्लकुना दोका, नावा लोकल्लकुनाहेंदाल दोका, वैरे जातितोरहेंदाल दोका, सहरते दोका, बय्लि जेगाते दोका, समुद्रमते दोका, विस्वासुल्लकुम इंचि नळेह कियाना मनकालोर्कुना हेंदालगुडा नाक दोका मत्ता.

27 नना मेहनतते, कस्टमते मत्तन. बच्चुंगो मल्कां निद्र हिलाकोटा मनमळते, कर्वुने-दूपाते, उपासम, पीनिते मत्तन, कपडिं हिलाका मत्तन.

28 इच्चोरे आयाका, अन्नि कलिसियाना पिकिर नाकुन रोज परेसान कीसेक मनुंदु.

29 बोरन्ना विस्वासि विस्वासमते कमजोर आते, ननागुडा कमजोर आताप नाक अनपिच्चोना? बोरन्ना मनकल इंकावरोन विस्वासमताल अरहानयते नाक होंग वायोना?

30 नाकु गिंटा पेद्दिदकेम कियाना मत्ते, नना किया पर्खा कबाहकुना बारेमते पेद्दिदकेम कीतन.

31 नना वळकानद आबद्दम आयो इंचि सामि येसुना पेनबाबांक एरपाटे मंता. ओन्क बस्केळक दन्यवाद आयि.

32 नना दमिस्क सहरते मत्तस्के, अरितास राजाना हेंदाल ओना राज्यपाल नाकुन पियालय सहरते पहारा कीसेक मत्तोर.

33 गानि अस्के नाकुन इच्चुर उंदि तट्टाते उप्पिचि गुरेता किळकिताल हब्बेर रेहतुर. इल्हा नना ओना कय्दाल पिस्तन.

12

पौलुसना दर्सनाल्क

1 नना पेद्दिदकेम कीते नाक बतल पायदा दोर्को, गानि पेद्दिदकेम किया पीसेक मंता. सामि नाक हीता दर्सनम आनि हुपिस्ता मर्ममता पोल्लेन बारेमते वेहंतन.

2 किरिस्तुन विस्वासम कीतोर वरोर मनकल नाक एरपाट. पडनालुं वर्साना मुन्ने पेन ओन मूडो स्वर्गमदाका पीसि ओता. अस्के ओर मेंदुल्ले मत्तोर, मना हिल्लोरा नाक तेळियो. पेनदुके तेळियंता.

3-4 आ मनकल मेंदुल्ले मत्तोर, मना हिल्लोरा? अद नाक तेळियो, पेनदुके तेळियंता. गानि इच्चोर एरपाट गदा, ओन पेन सुकमता जेगाते ओता. मनकंक वेहालय अदिकारम हिल्वसोंटव पोल्ले अगा ओर केंजतोर.

5 इसोंटा मनकना बारेमते नना पेद्दिदकेम वेहकुंतन. गानि ना बारेमते नावा कमजोरिन तप्पा, इंका बवे पोल्लेन बारेमते पेद्दिदकेम वेहोन.

6 नना पेद्दिदरेकेम वेहतेगुडा, निजम वेहताहाटीं नाकुन मूर्कुड इनावायो. गानि नना अल्हा वेहोन. बारित्ते नना कीता कबाहकुन हळता दानकन्ना आनि वेहता पोल्लेन केंजता दानकन्ना एक्को मान नाक हिय्यामन्नि.

7 नाक हुपिस्ता मर्ममता पोल्लेन वेल्लेने मत्ताहाटीं नावा लोप्पो पेद्दिदरेकेम वायामन्नि इंचि पेन नावा मेंदुलते उंदि हापु इरता. अद नाकुन दबांचि ईरलिय देय्यमता दूतालेसीं कोहकसेके मनंता.

8 अद हापु नहागटाल तेंडा इंचि, मूड मल्कां सामिन विनंति कीतन.

9 गानि सामि नाकुन, “नावा कुर्पा नीकु सालांता, बारित्ते निमे कमजोर मत्तस्केन नावा ताकत कबळ कीता,” इंचि जवाब हीतोर. अदुनहाटीं नना कमजोर मत्तस्के किरिस्तुना ताकत नाकु तोळ आयागोम इंचि वेल्लेने कुसिते पेद्दिदरेकेम कीसेक मंतन.

10 नना कमजोर आतस्केने, किरिस्तुना लोप्पो गट्टिगा मनंतन. अदुनहाटीं कमजोर आयिना, अपमानम आयिना, कस्टम आयिना, सताव आयिना आनि आपत्ति वायिना नना कुसिते मनंतन.

कुरेंतिता कलिसियाताहाटीं पौलसना पिकिर

11 मीवा बल्मितेन नना मुर्कनलेसीं पेद्दिदरेकेम कीसेक मंतन. नना कदरलायक हिल्लेन आयावच्चु, गानि पेद्दा-पेद्दा प्रेरितुल्कुंकन्ना बदे पोल्लेते तक्को हिल्लेन, अदुनहाटीं मिमेट नावा पेद्दिदरेकेम किया मत्तिर.

12 मीवा नड्डुम नना ओप्केते मत्तन, नावाहेंदाल चिन्हां, इंचंत्रमता कबाहक, पेनदा पेद्दा-पेद्दा कबाहक जर्गताहाटीं ननागुडा निजम प्रेरितुने इंचि दिसंता.

13 वेरे कलिसियांकन्ना मिमेट बद पोल्लेते तक्को मत्तिट? सिराप इदे गदा, नना मीपोरों बर्वु आसि मना हिल्लेन, इदे नावा तप्पु, नावा तप्पुन मापि कीम्टु.

14 इंदके नना मूडो मल्का मिहगा वायालय तयार मंतन, इंदकेगुडा नना मीपोरों बर्वु अरहोन. बारित्ते पिलाल्क तल्लुर-बाबोनहाटीं दनम संपालिच्चुर गानि, तल्लुर-बाबो पिलाल्कुनाहाटीं दनम संपालिच्चंतुर. अदुनहाटीं नाक मीहेंदाल बतल मन्नि, मिमेटे गावाले.

15 नना मीवा आत्माता पायदाताहाटीं नना इरगा कुसिते कर्स कीतन, अवसरम अरते नना कुद्दु कर्स आंतन. नना मीकुन वेल्ले पावरम कीतन इंचि मिमेट नाकुन तक्को पावरम कीतिरा?

16 नना अय्ते मीपोरेर्ो बर्वु वाटा हिल्लेन गानि, “पिलान कीसि माकुन बोंकिचोर” इंचि मिमेट नाकुन इना वच्चु.

17 नना मिहगा लोहता लोकुल्लुकुनाल बोरा हेंदालन्ना कपटमते नना पायदा एततना?

18 नना तीतुन मिहगा होन इंचि विनंति कीसि, ओनतोनि वरोर दादानगुडा लोहतन. तीतु कपटमते मीहेंदाल बतलन्ना पायदा एततोरा? अल्हा एतो. नना आनि तीतु इव्वुरोम उंदे आत्माते, उंदे रीतुने ताकंतोम.

19 महगा तप्पु हिल्ले इंचि हुप्सालय इवन्नि मोमोट मीक वेहसेक मंतोम इंचि मिमेट इनकुंचंतिर आयावच्चु, गानि आयो. मोमोट अय्ते पेनदा मुन्ने किरिस्तुना अदिकारमते वळकंतोम. पावरमगल्लोरिता! इवन्नि पोल्लें मीवा विस्वासम बेर्सनाहाटीगे वेहसेक मंतोम.

20 बारित्ते नना मिहगा वातास्के, मिमेट इनकुत्ताप नना मीक दोर्का पर्ोन आयावच्चु इंका नना इनकुत्ताप मिमेट मंदक होननिर. बोर्क एरपाट, मीलोप्पो जगडालक, कळक पोतमळ, होंग, सतता पायदा, अपमानम, पेद्दिदकेम, चुगलीं, लोल्लिं इसोंटवगुडा दिस अरानुं इंचि नना वेरियसेक मंतन.

21 अल्हेने नना मरी वाता पजा, इच्चुर विस्वासुल्लक कराब कबाहक, बोगमतनम, लंजेतनम इसोंटा पापाल्लुकुनाल मनसु मार्सकुनाकुंटे नाक वेल्ले दुक्कम आयार. अचोने आयाका पेनदा मुन्ने नावा सिग्गु होनना वेला वायारो बतल इंचिगुडा वेरियतन.

13

पौलुसना आकिरता पोल्लें

1-2 नना रोंडो मल्ला मिहगा वासि मत्तस्के, पापम कियमट इंचि वेहचि मत्तन. इंदके नना मिहागटाल लक्कु मंतन गानि, मरी उंदि मल्ला अदे पोल्लेतुन नना वायाका मुन्ने मीक वेहसेक मंतन. नना मूडो मल्ला वातस्के, बोरा अय्ते मुन्ने पापम कीतुर, इंदकेगुडा कीसेकेने मंतुर ओर्कु, अल्हेने कळमतोर अंतोर्क सिक्सा तप्पो. बारित्ते दर्मसास्त्रमते, “हरेक पोल्लेतुन निजम कियालय इव्वुर हिलाकोटे मुव्वुर गवाइदार्कुना अब्सरम मनंता, ☆” इंचि रासि मंता.

3 किरिस्तुनाहेंदाल वळकंतोर इत्तदुना बारेमते, मिमेट आनवल बतल इंचि पूसकीतिर. किरिस्तु मीहाटी कमजोरि आयो गानि मीलोप्पो ताकत आसि मनंतोर.

4 बारित्ते, किरिस्तु कमजोर आसि मत्तस्के ओन कृसनपोर्री मोल्लां कोह्किस् वेलाळ वाटतुर, अयना गानि पेनदा ताकतते ओर मर्रा तेदसि जीवाते मंतोर. मोमोटगुडा ओनालेसीगे कमजोर मंतोम, गानि मोमोट मीवाहाटी पेनदा ताकतते किरिस्तुनतोनि जीवाते मनंतोम.

5 मिमेट नाकुन परिकसा कीसि हळना दानकन्ना, मिमेट विस्वासमते मंतरा हिल्लिरा, मीवद-मिमेट परिकसा कीसि हुळाट. अस्के येसु किरिस्तु मीलोप्पो मंतोर इंचि अनपिच्चोना? अल्हा अनपिच्चाकोंटे मिमेट ओना लोकुल्क आयिर इनकुंद.

6 नावा आसे मंता, मिमेट परिकसा कीसि हळते, मोमोट निजमे किरिस्तुना प्रेरितुल्कुम इंचि मीक अनपिच्चंता.

7 ओक्काला मोमोट निजम प्रेरितुल्कुनालेसी मीक दिस्साकोन्नागुडा, बतल सत्तेम मंता अदे कियाना इंचि मीहाटी पेनदुक पारतना कीसेक मंतोम.

8 मिमेट सत्तेमते ताकते दानकु विरोद मोमोट किय्योम, गानि सत्तेमताहाटीगे सहायम कीतोम.

9 मोमोट कमजोर मत्तोरालेसी दिस्साना गानि बतल आयो, मिमेट ताकतते मत्ते माक आनंदम आंता. इल्हा मिमेट ताकतते बेर्सेक होंदना इंचि, मोमोट पारतना कीसेक मंतोम.

10 अदुनहाटी सामि मीकुन नासडेम कियालय आयो गानि, गट्टिगा निलाहलय नाक अदिकारम हीतोर. नना मिहगा वातस्के नावा अदिकारमते मीतोनि कडक वळ्ळकना वेला वायामन्नि इंचि, मिहागटाल लक्कु मनैकेने इव पोल्लें रासेक मंतन.

11 विस्वासुल्कुनिटा! नना आकिरते वेहानद इदे गदा, कुसिते मंटु. मीवा गुनम बेस इर्राट, वरोंक-वरोर दैरनेम हीम्पु, उंदि मनसुने मंटु, सांतिते मंटु, अस्के पावरम आनि सांति हियाना पेन मीवातोनि मनंता.

12 मिमेट वरोंक-वरोर कलियतस्के पवित्र पावरमते जोहार कीम्पु.

13 इग्गेटा पवित्र लोकुल्क अंतोर मीकु जोहर वेहासेक मंतुर.

14 सामि येसु किरिस्तुना कुर्पा, पेनदा पावरम आनि पवित्र आत्माता तोळ मी अंतोरतोनि मन्निकांटी.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068